



Minggu, 02 Januari 2022
Ogen: Keluaren 13:21-22



Tuhan Nuduhkan Dalam



A pai nge si akap sikapen tupung kita nungkun alamat man kalak si simbel ras kita, nina si sekalak: 'erdalan kam 200 meter nari, lit kari beloken ku kanan ikutindu saja, janah erdalan kam 50 meter nari lit persimpangan ku kawes ras ku kemuhen. Emaka pilihndu ku kawes, lanai kari ndauhsa jumpa kam ras alamat si itujundu.' E maka nina si sekalak nari: 'alamatndu e ndauh jenda nari, ota ku taruhkan kam gelah la akapndu latih daram-daram.' Uga pe ninta si peduaken e sikapen. Sabap lanai kita bera-bera ras daram-daram. Tambah tambah ateta malemna adi si gejam i bas ndalani wari-wari e lit temanta si ngasup nuduhkan dalam si payo, si mabai kita seh ku tujun.

Dibata teman man bangsa Israel tupung ia erdalan i Mesir nari. Ibabai Tuhan ia arah dalam si meluk-eluk arah gurun pasir nandangi lawit Merah. La ibaba Tuhan bangsaNa arah dalam si ndeher sabap la ate Tuhan ia mulihken ku Mesir, ingan perbudaken e. Amin pe dalin si meluk-eluk ras gurun pasir, la ipediat Tuhan ia erdalan si sada, itemani Tuhan ras ituduhkenna dalam si man dalanen. Tupung suari ibahan Tuhan tiang awan si ngampang-ngampangi bangsaNa erdalan gelah la kena las matawari. Tupung berngi ibahan Tuhan tiang api gelah iidahna dalam si man bentasen. Ibahan Tuhan menahang perdalan bangsaNa, di kune lit musuh Tuhan arah lebe ngolang-ngolangisa, Tuhan si erperang gelah bangsaNa selamat.

Tahun si mbaru enda sada kesempatan man banta menaken perdalanan geluh ras Tuhan. IA tetap ersikap nemani ras nampati kita, ipenahangiNa babanta si mberat, iampang-ampangiNa kita i bas musuhta nari seh kita mejuah-juah. Tiang api ras tiang awan e simbol penemani Tuhan, seh ku tujunta sekalak-sekalak itaruhkenna.

Amin dalam meluk-eluk Tuhan tetap nemani